

Viver sco a chasa

Ils 12 da mai es il di internaziunal da la chüra. Adüna daplü pesunas han dabsögn d'ün lö da chüra. A Scuol ha la «Gruppa da chüra» grond success pervi da sia filosofia da viver sco a chasa.

Fadrina Hofmann Estrada

Chi chi aintra i'ls locals da dmura da la «Gruppa da chüra Scuol» vain il prüm da tuot bivgnantà d'üna veglia chogna. Laika es üna dama da la razza Dackel ed insembel cun nouv pesunas viva ella süel plan terrain a Prasang-chèr. Oriundamaing deriva Laika da Turich. Sia patruna tilla ha pudü tour cun sai cur ch'ella ha fat müdada illa «Gruppa da chüra». In ün'otra chasa da chüra füss statta la chogna ün cas pel veterinari. Quia tocan bes-chas chasanas eir pro la cumünanza. Il chan trategna als abitants ed al persunal da chüra ed el svaglia ün'atmosfera viva sco in üna famiglia.

Atmosfera clera ed amiaivla

La «Gruppa da chüra» fa part dal «Center da sandà Engiadina Bassa» ed es gnüda fundada dal 2007 per mancanza acuta da lets da chüra. In fra cuort temp vaiva stuvü trar il Circul masüras ed ha chattà lura üna soluziun a Prasang-chèr. La chasa d'eira fingià in construcziun, quai chi's veza amo adüna vi da la partiziun dals locals da la dmura. Oriundamaing d'eiran nempe planisadas abitaziuns sün quist plan. Uossa saja stanzas singulas per mincha abitant da la vart dal nord dal stabilimaint e locals per as trategner da la vart da süd. «Visitaduors lodan adüna che cler ed amiaivel chi'd es pro nus», disch la manadra da la «Gruppa da chüra», Vreni Salis. L'atmosfera d'abitaziun suottastricha amo il concept da la dmura, nempe da viver sco a chasa. Daspö cha la «Gruppa da chüra» exista, d'eiran las stanzas adüna occupadas. Criteris per gnir tut sù nu saja ingüns. Pel mumaint abitan ses duonnas e trais homens a Prasang-chèr. I's tratta da pesunas attempadas chi sun per gronda part dementas in differents stadis. I dà eir abitants tschirats o cun malatias da cour. Registrada pro'l Chantun es la «Gruppa da chüra Scuol» sco dmura da chüra. Üna visita muossa però svelto chi's tratta d'üna dmura tuot particulara.

Integrà illa vita da minchadi

Bunura a las nouv: Trais duonnas sun vi dal püschain. Minchüna ha sün seis plat quai chi tilla gusta. La bu-



Las chürunzas e'ls abitants han üna relaziun famigliara.



Laika tocca pro la «Gruppa da chüra» e fa plaschair ad abitants ed al persunal. fotografias: Fadrina Hofmann Estrada



Che chi dà da püschain decida mincha abitant e mincha abitanta svesa.

nura e la saira saja pasts tenor giavüsch. Il menü da mezdi decidan tuots insembel, tuot tenor gusts ed ideas. Ün o tsel abitant güda dafatta a preparar il giantar o dà tips da cuschnar. «Quia vain l'abitant integrà uschè bain sco pussibel illa vita da minchadi», spiega Vreni Salis la filosofia da la dmura. L'essenzial saja da laschar la dignità da mincha persuna. Cun quai es eir maniada la sfera privata. Mincha abitant ha la pussibilità da's retrar. Minchün ha eir ün'aigna clav per sia stanza. «Ils abitants desan pudair restar independents», disch la manadra. Uschea nu saja neir ningüna structura da di fixa. Minchün po decider individualmaing cur ch'el less star sù, che ch'el less far d'ürant il di e cur ch'el va darcheu a durmir. La not pissera üna guardgia da not pel bainstar dals abitants. A partir da las set saja il servezzan da chüra ed accumpognamaint e davent da las ot es pront il püschain. 14 pesunas cun plazzas cumplainas e parzialas lavuran illa «Gruppa da chüra». Be la guardgia da not es ün hom.

Tuots as dischan «tü»

Illa «Gruppa da chüra» ha mincha abitant üna persuna da contact. Quella vain tschernüda cur ch'ün nouv abitant aintra illa dmura ed ella resta adüna listessa. La persuna da contact es üna persuna da fiduzcha. Ella lavura culla biografia da «seis» abitant, as lascha dimena quintar da la vita passantada. Quellas infuormaziuns güdan ad incleger reacziuns, preferenzas o temmas. La chüra e l'accumpognamaint vain drizzà tenor ils bsögns individuals. Ün tip da not nun ha dimena da müdar cumplettamaing seis ritem cur ch'el aintra illa dmura ed ün amator da musica po viver sia paschiun eir quia. Illa «Gruppa da chü-

ra» as dischan tuots dal «tü». Il tun da discuorrer es famigliar ed avert. Vreni Salis doda be subit scha sia frisura nun es üna jada bella. Culla chürunza giuvna gioda ün abitant da far las plaschantinas. Il team da Prasang-chèr es pitschen e mincha chürunza es respunsabla per tuots e fa tuot las lavuors, sajan quai lavuors da chüra, cuschnar, far l'altschiva o ir a spass cul chan. Ün'animaziun sco i'l club nu saja, mo suvent chantan las chürunzas insembel culs abitants. Bliers d'eiran plü bod in ün coro e davo marena o davo tschaina giodan tuots las chanzuns in cumünanza.

Tuots vegnan acceptats

Ils dis passan cun far quai chi plascha e chi'd es amo pussibel a regard la sandà. Frau Brunner sa cusir amo bain, duonna Luisa legia gugent la gazetta e sar Walter passainta blier temp sül balcon. Minchatant vain ün cuntschaint sur il prà per dar üna baderlada culs abitants chi sun our il liber. Ils vaschins chi stan ill'istessa chasa portan da temp in temp revistas che'ls nu douvran plü per tratgnair als abitants. Tanter pèr saja simpatias ed antipatias, sco in mincha famiglia o uscheditta «WG». «In quista chasa vegnan tuots acceptats, eir quels chi dan in ögl daplü causa malatia», disch Vreni Salis. Sch'inchün manca üna jada vi da maisa, dumondan ils oters subit davo quella persuna. D'incuort es mort ün abitant. Pro'l process d'accumpagnar la mort ha tut part mincha abitant intensivamaing. I's interessa pel destin da l'oter. E listess nun es la «Gruppa da chüra» ün lö isolà dal muond, anzi, id es üna chasa averta sainza temps da visita, cun clavs pels confamgliars e la pussibilità per minchün da gnir üna jada a dir allegra.